



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XXIV. Gregorii Papae I. Ad Leontivm Episcopvm Vrbinate. De infirmitate Castorii, & visatione eius ecclesiae.

urn:nbn:de:hbz:466:1-15221

tibi agenda mandauimus, cum consilio magnifici atque eloquentissimi Marcelli filii nostri te agere profecto necesse est, quatenus ita omnia quæ huius præcepti pagina continet solícite strenueque possis implere, vt nulla te neglectus culpa respiciat.

EPISTOLA XXIII.

GREGORII PAPÆ I.

AD PETRVM SVBDIACONVM.

De lapsu Secundini, & ordinatione Theodosii.

Gregorius Petro subdiacono Campaniæ.

QVAMVIS horrenda execrandaque nimis Secundinum ad aures nostras peruenerit crimina commisisse, hoc tamen solum ad eius damnationem potest sufficere, quod etiam ipse de se dicitur fuisse confessus. Cognouimus autem ab eo dictum, quod dum tertius a loco esset abbatis, a statu habitus sui lapsu corporis ceciderit: & licet ad abbatis ordinem tanto coinquinatus facinore nulla debuerit ratione proficere, tamen quia temerario post ausu ac tanta pollutione detentus hoc indignus arripuit, experientiæ tuæ huius auctoritatis tenore præcipimus, vt præfato Secundino remoto ab abbatis officio, Theodosium, quem congregatio ipsa sibi petiit ordinari, in monasterio sancti Martini abbatem solenniter per eum cuius prouisio interest facias ordinari; quatenus in cura congregationis subiectæ, adiuuante Deo, cauta possit solitudine vigilare. Possessiones vero, vel hortos eiusdem monasterii, ecclesiastica, in quantum ratio patitur, tuitione defende.

EPISTOLA XXIV.

GREGORII PAPÆ I.

AD LEONTIVM EPISCOPVM VRBINATEM.

De infirmitate Castorii, & visitatione eius ecclesiæ.

Gregorius Leontio episcopo Vrbinati.

CASTORIVM fratrem & coepiscopum nostrum hic pro corporis sui molestia retinemus. Et quia nunc ad suam ecclesiam non valet remeare; propterea, eo absente, ec-

Concil. Tom. 13.

Pp

*Ioan. diac.
lib. 4. c. 53.*

clesiæ ipsius fraternitati tuæ operam prouidimus visitationis delegandam, admonentes caritatem tuam, vt ita efficaciter omnes vtilitates eius exerceat, quatenus tui præsentia proprium se, absentem habere non sentiat sacerdotem. Quidquid autem tibi visum fuerit pro vtilitatibus eiusdem ecclesiæ ordinare, habebis modis omnibus ex nostra permissione licentiam. Reditus vero vel ornamenta, ministeriaque ipsius, sollicitudinis tuæ intuitus & cura conseruet. Et præter ordinationes clericorum, cetera omnia in prædicta ecclesia tamquam cardinalem & proprium te volumus agere sacerdotem.

EPISTOLA XXV.

GREGORII PAPÆ I.

AD CIVES ARIMINENSES.

De infirmitate Castorii, & visitatione Leontii.

Gregorius vniuersis habitatoribus Arimini.

Ioan. diac.
lib. 4. c. 53.

Si in culpam vestram, filii dilectissimi, intentius velitis attendere, assidua vos apud Deum debetis oratione purgare, quod episcopum vestrum non deuota mente, nec vt filii suscepistis; quem inquietudo & tribulatio a vobis illata ad hoc vsque perduxit, vt molestiam corporalem incurreret: quamuis in eo nihil de his quæ nobis sunt scripta cognouimus, sed solam inesse debilitatem vidimus, pro qua eum hic retinere curauimus. Et quia illuc modo ad præsens non valet remeare, ecclesiæ vestræ necessario prouidimus Leontium fratrem & coepiscopum nostrum visitatorem per omnia deputare, cui etiam nostris scriptis iniunximus, vt omnia quæ ad curam vtilitatemque ecclesiæ pertinent, tamquam proprius episcopus debeat ordinare. Vos ergo ita ei in omnibus obedite, quatenus operam sibi visitationis iniunctam vestra virtute, salubri in omnibus deuotione possit complere.